

**Zeitschrift:** Schwyzerlüt : Zyschrif für üsi schwyzerische Mundarte

**Band:** 5 (1942-1943)

**Heft:** 9-11

**Artikel:** Törggahülschat

**Autor:** Loher, Josefina

**DOI:** <https://doi.org/10.5169/seals-179587>

### Nutzungsbedingungen

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Siehe Rechtliche Hinweise.

### Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. Voir Informations légales.

### Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. See Legal notice.

**Download PDF:** 01.04.2025

**ETH-Bibliothek Zürich, E-Periodica, <https://www.e-periodica.ch>**

## Törggahülschot.

De Föawéand bloost dors Törggafeald,  
di Kolba seand scho riif, schöa gealb.

As moas an luschtige Hülschat gea,  
ma ladt di halb Gmoand ii druf hea.

Da Huuffa törmst si i der Stuba  
fascht ganz bis zu dr Tecki ufa.

Bald ruckid d Buobe n und d Moatla n ii.  
Aber henacht wemmer emool luschtig sii!

Das Hülsche louft, es ischt e Fröüd,  
ma lacht und singt, swerd oam nüd blöad.

Bim Aablick vo dem Kolbaglanz  
fröüt ma si scho uf e Walzertanz.

De Musikant neant d Orgle n uf d Knüü.  
Juhei! Ma tanzt bis am Morga n am drüü!

Josefine Loher, Montlingen.

## Min Vatter fahrt z Acker.

Min Vatter fahrt z Acker,  
und head er koa Roß,  
so giid er em Karre  
halt sealber de Stooß.

Mini Mueter kocht Ribel,  
und head si koa Schmalz,  
so rüert si i d Pfanne  
a Briise mea Salz.

Min Brüeder baut Hüüser,  
und das ischt sin Stolz,  
und seands nüd vo Marmor,  
so seands halt vo Holz.

Mini Schwöschter büezt Kleider  
all Taag um e Dank,  
und seands nüd vo Siide.  
so seands halt vo Hampf.

Und ii han a Schätzli,  
s könnt schöaner nüd sii  
und trinke halt Wasser,  
vermaag i koa Wii.

Kaascht überall leaba  
im Glück uf dr Wealt;  
es hanget am Fride,  
und s hangt nüd am Gealt.

Julia Lang.

## Wie d Widnauer redid:

E jedes Hüüsli heat en Gibil,  
und jeda Morge eaßt me Ribil,  
vil Goafa geand en ganze Schübil,  
und s Wasse: holid s mit em Kübil.

Me hebt de Stier und s Roß am Zügil,  
de Goasche git me mit em Prügil,  
i jeder Stube heats en Spiegil,  
i alle Reaba steckt me Stiegil.

Me picklet Löcher mit em Pickil,  
für Stiegil seet me o no Stickil,  
en große Huffa ischt en Breagil,  
es Tuech am Schiff, äas ischt e Seagil.

E Moatli treet im Zopf en Bendil,  
und weaga nünt hend d Bube Hendil,  
för s Hääs heats a dr Wand en Nagil,  
en Gääggi ischt en tumme Hagil.

## Lied vo da Muntlagar Reabmoatla.

Nöüa Wii vom Reabahang  
wemmer hüt gi hola.  
Buttemaa, es goht nöd lang,  
ischt da Kübel volla.

Und da Suuser südt im Faß,  
git an healla Roata.  
Hond Giduld, es ischt koa Gspaß,  
söll dä Tropfa groota.

s ischt vo alters häär soa gsii  
uf da liaba Ärda:  
Junga Muot und junga Wii  
mueß z erscht eppis wäärdä.

Blaui Trube — Heiters Härz,  
freut om allerweaga,  
und im Rhintel sunnawärts  
wemmer beedes pfleaga.

Julia Lang.

## De Schollapuuc vo Kriessere rüeft:

Scholla, jawolla,  
koofid Scholla statt Kohla!  
Muonts nöd verzolla!  
s git ka Kontrolla!  
Könid s gad hoola!  
Scholla, jawolla,  
koofid Scholla statt Kohla!

Julia Lang.